



DEO OPTIMO MAX.
UNI ET TRINO.

VIRGINI DEI-PARÆ, ET S. LUÆ
Orthodoxorum Medicorum Patrono.

QUÆSTIO MEDICA.

CARDINALITIIS DISPUTATIONIBUS
*manè discutienda, in Scholis Medicorum, die Martis decimâ-septimâ
mensis Aprilis, anno Domini M. DCC. LIII.*

M. TUSSANO - GILBERTO BOULAND,
Regis Consiliario & Medico ordinario in ejus Castelletto,
Doctore Medico, Præside.

An Fasciæ infantibus, Lorica puellis?

I.



OMINE nil majus in terris generatur, nil quidquam huic simile viget aut secundum : cui elegantiam corporis, soliditatem simul, dignitatem oris, nec non & gratiam vultus benigna concessit Natura? Quam scita & aptè concinnata artus inter proportio, & partium harmonia! forma, sanitas, vigor, diurnitas, quam præclarâ dote in eo consentiunt! Eum meritò rerum terrestrium regem animantiumque imperatorem salutaveris; quoniam verò non

A

3
singulos fors eadem idemque decus excipiunt, gloriam dixeris generi uni-
versim datam potius, quam singulis, quibus sunt amara dulcibus permixta;
ne videlicet superbiant plus nimis: sic qui formam egregiam tollit verticem,
nutat intus pravo stomacho: qui sanitate gaudet firmam & vegetam, vitium ce-
lat tacenda conformationis. Forte ita esse legem naturae existimes, ut mul-
ta inter generis ejusdem, pauca ex omni parte beata excellent, quemad-
modum umbram collocatam tabellarum pictarum, lumina praecipua personarum
extare jubent, & quasi foras prominere? Quoniam fato, huic legi servitutis
solus homo foret obnoxius, quam legem animalia diversa neutiquam patiuntur?
Seu enim ea spectes quae sub aquis degunt, seu quae Aëra tranant pen-
nis, aut quae accubant in sylvis, aut tandem ea quae nobiscum conversantur
intra domos nostras: erunt alia quidem aliis pulchriora, multa sine virtutibus
corporis, nulla cum vitio & male conformata. Omnia implent naturae suae data
tempora, cuncta valent, vigent, nulla languent tædio aut aegritudine; dum
homines plures pereunt, quam vivunt, è viventibus in ipso pubertatis limine
multi vitam ponunt, & è cæteris plerique excedunt immaturi, plurimi vi-
vunt male conformati & peccantes in aliqua corporis parte. Credemus Naturam
affectam senio germina efficta educere & frustranea, & propterea fortis ig-
navos, sine nervis, trudere in lucem? Injectam hanc olim Naturae calumniam,
Socrates in veram causam rejecit: agimus sedulo, ne generosus sanguis coeat
in brutis cum ignavo & imbecillo, ne gementur placida immitibus, ipsi
magis libidini quam rationi obtemperamus. Causa est altera mali: anima-
lia naturam sequuntur ducem optimum, & membra eorum in statas men-
suras & proportionibus debitas abeunt liberè, vi nullam artis cogente, nullam re-
primente; à quibus tamen proportionibus, mirum quantum pendeat sanitas cor-
poris & robur partium: homines autem, parente naturam scilicet doctiores,
opus ejus emendare cupiunt & corrigere, corpora infantium mollia & uda in-
star ceræ, fingunt artificio novo improbae consuetudinis, stultive praejudicii;
cum naturam rectam torfere, bonam corrumpere, pulchram deformare,
tùm demùm sibi placent ingeniumque suum demirantur.

Sua maribus sunt destinata tormenta, sed majora femellis. Invaluit mos,
ut illae laudarentur formae, non quae sunt corpore solido, succoso, colore
vero, sed quae graciles, junceae, demissis humeris, procerae forent & de-
licatae; hinc Fasciae strictae circum corpora infantium, hinc Loricæ duræ cir-
cùm pectora puellarum, hinc altiuscula eriguntur calceamenta, ut quae puel-
la erat naturam bonam & sinceram, curando male evadat debilis & imbecilla.
Uxor deducitur domum, matrem factam pudet sui decoris; uterum pre-
mit artibus vestibus, iisdem uritur calceis, imò ne venter antrorsum projec-
tur quasi fructum prodant, virgam inducet Balanarium, quæ, rigore inde-
flexo vim uteri nitentem coerceat, hominemque vix dum conceptum, jugo
opprimat humanarum miseriarum; sic, cum abdominis muscoli contrahuntur,
cogitur uterus in angustum, ægre è pelvi suos motus potest experiri, infans
perit abortus, vel si est ejectus ad lucem, distortus, infirmusque lugebit
diu & nocturnum, quod matris suae peccatum est. Ergo puellae intactae adhuc,
ubi primum conjugii primum cognoveritis, omnia vincula exuite vestium
vestrarum, omnem excutite servitutem consueti moris; mollis & cer-
ea proles permittatur naturae, nec corpus tenerum deprecantis nati fasciis
colligate; nec, ubi vos matres agnoscat dulci risu, loricis duris involvite,
quæ, ut conformationi membrorum obsunt non parum, ita & sanitati noc-
cent quam plurimum,

PARTIBUS omnibus cuiuscumque corporis, sunt certæ inter se leges proportionum, à quibus, nisi vi coactæ, recedunt nunquam. Unâ, vel alterâ parte individui cuiuslibet cognitâ, ad cæterarum cognitionem facile deveniri potest; ita omnes quodam concentu sibi invicem respondent. Unde Philosophi, dum genus humanum exigunt ad hæc leges, deformem vix aut fœdum hominem vident in naturâ, quoniam in eo qui turpissimus est, partium proportionem deprehendunt, ita inter se concordem, ut vitiis quæ reprehendimus, sublatis aut correctis, multo vitiosior forma redderetur: his quorum sunt resimæ patulæque nares, oblongæ atque incurvæ nocerent, vel solâ discordiâ cum cæteris faciei partibus. Qui in vultu, concentus micat, viget in cæteris partibus. Existit autem, dum cunctæ partes in embryone inclusæ, & quales explicabuntur ætate ineunte, evolvunt sese liberius, obice nullo aut repagulo naturæ conatum impediens. Hæc corporis harmonia ab ossibus pender, quibus fundamentum subest primum & commune, Spina. Frustra spectandus erit juvenis floridâ facie, nigris oculis, capillo nigro, oris decore, infelix summâ, si vitio aliquo spina mulctetur graviter, à quâ corpori status & pulchritudo præcipua. De naturâ, situ, variisque spinæ inflexionibus essent scribenda plurima, quæ mittimus ad anatomicos; pauca subijcimus quæ scopo nostro inserviunt.

Spina columnæ est ossea, ad pyramidis figuram non nihil accedens, in os sacrum, quasi in basin imposita. Pyramidem contexit 32 ossicula, spondyli seu vertebræ dicta, quæ junguntur inter se mediante corpore ligamentoso, quibus vincituram præterea addunt superficies cartilagineæ; insuper omni ex parte circumdantur fibris ligamentosis à superiori vertebrâ, in inferiorem descendantibus; unde, non male habebis totam spinam quasi inclusam ligamento quod postulamus appellari *vaginale*. Quid ex hac structurâ eveniat si liberum sit naturæ, fugit neminem in rebus physicis tantisper versatum; vertebræ omnes prementur pariter, pariter colluctantur, suum locum servabunt omnes, omnes ordine crescent æquali & sine errore viæ: Ita columnæ liquoris dum sibi invicem resistunt & æqualiter, retinebuntur in vase suo, nulla victrix effugiet; tollatur Aër huic incumbens, statim dimovebitur, superataque à vicinis ascendet. Idem de vertebris; rumpatur, debilitetur ligamentum hæc vel illâ parte, statim excidet vertebra sineque descriptos transiliet cum dispendio vicinæ, sui que dedecore; projiciatur in posteriorem partem, *κνίσις*, vel *κνίσις* oritur; intus aufugiat, *λέρσις* & sternum prominet; lateralia ligamenta seu vaginale infirmantur, inflectetur spina, inclinabit in latus, & erit *σκολιωσις*. Idem malum oriri potest à causis internis: sic ex tussi, ex asthma, empyemate, hydrope gibbositatis, observante Divino senè. Has causas prætermittimus nunc, ut præsentis quæstioni non cohærentes. Spina licet innocens, partis alterius dolentis pœnam sæpe cum eâ sortitur; muscoli lumborum, dorsi, brachii tendantur nimia vi aut impariter, spina tunc in hoc vel illud latus male amabit vergere. v. g. omoplata unâ parte depressior sit, spinam etiam inflecti & in contrarium fursum projici necesse est. Ita ex uno latere deprimatur Ilium; accidet etiam spinam indecorè detorqueri.

Spina nullo laborat vitio; ided-nè rectus es, & factus ad unguem? Minime; si aliquo morbo tentantur partes ad concentum stabilendum necessariæ. Ut suæ Thoraci seu pectori virtutes, sic etiam sunt vitia: costis, claviculis, sterno, scapulis præscriptæ sunt proportionem, mensuræ, & limites;

intra quæ si non consistant, læditur recta corporis conformatio. Ligamenta quibus ossium accretio, figuræ eorum & fines committuntur, Thoracem etiam dirigunt. Si relaxentur; citò peccabunt ossa Thoracis, fient tubera, deformabitur sternum, gibbosum, aut carinatum evadet, raroque inde spina evaserit incolumis. Neque ad corporis formam, ex ossibus innominatis accedit gloria tenuis: in viris altiora sunt, in feminis latiora extrorsum magis vergunt, nec sine honore atque utilitate; ossi sacro & inter se ligamentorum ope coherent; debilioribus ligamentis à se recedent, propter Cartilaginum mollitiem fient deformitates, tubera, curtatio partis, claudicatio, Luxatio, &c. Similiter similibusque de causis peccant extremitates. Vitia omnia hæc de quibus diximus, facilius irrepere infantibus, edocet ossium foetus cognitio. Ossa enim tunc teneriora, epiphyfes habent quæ, cum diaphysi seu medio osse committuntur; Epiphyfes, ruptâ molli & delicatâ Cartilagine, dirimuntur; è sedibus suis excutæ, junguntur obliquè postea ossibus, quâ ipsâ re membra inæqualiter tument atque incurvantur. Præterea ossa sponte dimoventur, ligamentis ut pote facile extensilibus ultra tonum resilientibusque difficile in statum priorem. Corpus sui impatiens, prurit usque extumescere; sed intra cancellos à naturâ positos remanet decenter, & singulæ partes locum, formam, honorem sortiuntur, dum resistentia proportionalis & debita objicitur omnibus: hùc vel illuc vergat victoria, superiora aut inferiora evadant, premantve impariter ligamenta, quæ rectæ corporis conformationi præesse, non male credideris, pars aliqua statim projicitur indecorè, deviat, apta & jucunda hæc delabatur harmonia discordiâ partis unius. Ex dictis jam subolet quanta labes corporum formæ à Fasciis & à Loricis.

I I I.

FÆTUS pressus pariter, sine vitio crescit in utero matris; è carcere erumpit in lucem, non nihil curvis artubus: molem ceream, mobilem vides motu, tripudio, agitatione gaudentem; motus ne reprimentur ergo: ita suadet natura, infans rogat modis flebilibus; præjudicata opinio, consuetudo vincunt; jam vincula subiit foetus, jam (dira præfagia futuri servitii) artus circum teneros fasciæ longæ disponuntur. Errant in amicitia parentes, sinceramque naturam incrustant, dum volunt perficere: quod ei videbitur manifestum, qui nutriti puerum involventi assederit semel, remque omnem attentè consideraverit.

Paratis linteis catenisque, arripitur infans nil tale cogitans, novâ exultans luce, & fidens libertati; reluctantes manus & indociles cohibentur durè; vagienti sub axillis immittitur primò linteum, mox in tenellos pedes invadunt, quos recalcitrantes licet affigunt intrâ linteum, altero alteri malè appositò; postea injiciunt pannum, qui coercetur fune non laxo, opus perficit & firmat fascia, quæ spiris ligat ingentibus orbes amplexa orbibus à pectore ad calcem.

Nec minimam adhibet vim nutrit in stringendo puello, ne forte sit in eo quicquam residui motus, quo nodos solvat lenfim, paulatimque se in libertatem vindicet. Quid inde evenit? Dolet omnis ambitus corporis, pressio reddit lentius incrementum corporis, non citò evolvent se partes, rarè vel potius nunquam premuntur *proportionaliter*. Extremitates seu epiphyfes ossium urgentur minùs, fortius partes mediæ, tubera jam fiunt faciliè; spina patitur deformitates, extruduntur vertebræ ex ordine suo emotæ, pressio nimium aut impariter ligamento vaginali, Ligamenta interna debilitate antagonista-

rum fortiora evadunt, & omne turbatur æquilibrium à quo recta corporis conformatio. Musculis brachii, abdominis in contractionem coactis adducitur spina & inflectitur; pelvis exurgit altior sed non sine periculo, qui raro latus erit, atque naturæ usibus accommodatus. Unde fœminæ proceriores graviditate & partum periculosiora experiuntur. Nec fasciationem minùs inculant extremitatum errores: premantur nimium, extendantur ligamenta, fugiunt è locis suis ossium capita liberiora, & crescunt ultra modum; stringantur Fasciis adductioribus pedes, fiet accretio circulariter, crura erunt distorta, habebis Sisyphum & compernem; varum aut valgum sapius, dum eadem causâ, extûs modò, modò intûs facillimè projiciuntur malleoli; quàm sapissimè vitia hæc eveniant neminem fugit, nisi in rebus anatomicis rudem atque planè hospitem.

E Fasciis tandem expeditur infans, alia eum vincula excipiunt, duriora, si molle & tenerum puellæ corpus exceptura sint. Formam elegantem effingere ambiunt; nec in tenui labor est: addendum hîc, illinc detrahendum; quod deprimitur excitandum, compescendum quod eminet. Hûc tendunt artes innumeræ, quæ thoracem latum, depressas claviculas, alvum dejectam nec projectiorem efficiant, mammas redundantes castigant, modulos præscribant elegantes, atque dum ossa innominata educunt, faciant habitum proceriorem. Inter instrumenta, quibus talia sperantur, invaluit *Thoracis* species quædam, non ferro hodie, sed rigidissimis & quasi ferreis virgis conferti; robur certè & æs triplex erat illi circa pectus, qui primus delicatulæ artus puellæ huic tormenti generi ausus est admove. *Lorica* inferiori parte strictiores, superiore latiores Balanariâ virgâ rigent, quæ aptè licet & affabrè cædantur, labore tamen multo, multoque renisu applicantur corpori, & porro debent applicari. Parte posticâ, quæ residet duæ virgæ rigidissimæ, primariæ & quali totius rei cardines, apophyses transversæ vertebrarum ut & costarum eminentiæ violenter urgentur; ligamenta externa ferunt extensionem nimiam, & compressionem; hinc necessariò prævalent interna; costæ inferiores duæ spurie tormenti hujus vim totam atque impetum recipiunt, unde immobiles stant & quasi fixæ continentur, eas autem costas natura voluerat moveri liberè, & quodam modo fluctuare; scapulæ claviculæque ad spinam ita adducuntur, ut luxatio imminuat; costæ verò à parte anticâ ad posticam magnâ vi trahuntur; ne venter, quòd minùs decorum putant, projiciatur, in *Loricæ* partem anteriorem infigitur bacillus leviter inflexus ex metallo, ligno, ebore, Balanariâ virgâ contextus, quo prominens umbilicus multum premitur: sic urgetur unde quæque & incauta si vellet mutare situm puella, repellitur durè monita, nec sine poenâ culpæ.

Loricæ illæ latiores licet in parte superiori, ab omni culpâ non carent: *Vitæ* confringunt & torquent humerum, qui tumet sæpè rubicundulus; nervi brachiales ut & musculorum principia, scilicet magni dorsalis, rotundi, scapularis, &c. strangulantur. Quæ vitia exurgere necesse sit ex talibus vestimentis, patet: succi nutritii cursus & distributio fiunt inordinate: his carceribus detentæ diem miserum trahunt puellæ, non audent, neque sine dolore possunt à situ præscripto tantisper desletere, nisi absente matre, aut immiti nutrice furtim indulgeant sibi, tunc humerum hunc vel illum expedire, vincula excutere, & laxare properè; at nimium, nimiumque extenta elongantur adhuc ligamenta & impariter, navique non reformidandi mutantur in vitia magna, nullâ arte, aut labore emendanda. Felices puellas, si periculum inde fieret tantum decoris aut staturæ, neque sanitati vitæque detrimentum pararetur!

ANIMALIS œconomix virtus & ordo pendet à circulatione humorum, qui eâ diffundantur lege, ut ad partes quaslibet symbola deferatur, nec major, nec minor debitâ: pro earum distantia à corde, structurâ, renisusque accipiunt sanguinem; oclusâ aliquorsum viâ, sanguis refluit, & quâ data porta, erumpit ferox. Ut sanitas consistat, cavendum est ne institutus ordo naturæ perturbetur. Circulatio pendet à respiratione, quæ non exercetur nisi movente abdomine ultrò citròque, arctato nunc, nunc laxato pectore: quæ actiones, nisi liberè, latè, facilitè fiant, vita languet, laborant omnes corporis functiones. Comprimitur externus corporis ambitus, resistentis ad superficiem dispositis, minor debitò fluidorum copia vasa externa transmittetur, parte superflua necessariò redundante in vasa interna, quæ libera sunt, onusque non suum coguntur sustinere; fiat compressio circa thoracis aut abdominis regionem, pejora evenient & citius; hinc infantes pereunt in cunabulis, puellæ in nuptæ adhuc ponuntur tumulo, aut languent infirmæ, Fasciærum, aut Loricarum victimæ immerentes.

Ætas infantium plethorâ, ut plurimum, laborat; vasa molliâ, pulpofa cedunt facilitè; Fasciis constringentibus superficiem corporis, in vasis cutis capillaribus ægrè fit circulatio, succus nutritius malè defertur & motu irregulari; inde macies, tabes, hectice, aliorumque morborum genera. Sanguis ire, redireque viam ab extremis cum latè non possit, majori copiâ versùs vasa interna refluit, totâ mole suâ incumbens. Vasa pulmonis & cerebri, ut potè molliora, replentur ultrâ modum; brevè actum est de vitâ miscelli infantis; oculi jam extuberant, livescunt palpebræ, ferreus imminet somnus, sanguis colligitur hæretque in pulmone aut cerebro, unde revocare viam nequit impeditus, & qui vivax erat virorumque fortium stirpem propagaturus, perit apoplexiâ, aut peripneumoniâ; si adfueris vocatus opportunè, abijciantur statim fasciæ, laxetur puer, & dimidium mali jam sustuleris. Erysipelata, pustulæ, tumores inflammatorii, morbi cutis innumerabiles, febres multæ quæ sæpius subsequitur mors nec pede claudò, inculant plerumque Fasciâs; itaque si animus est multos infantes morti certæ devotos servare, summi materiem mali, mittamus procul vincula.

Nec sanitati nocent minus Loricæ; comprimunt, ut vidimus, imprimis abdomen, & costas spurias inferiores duas ita torquent, ut in curvam figuram abire cogantur. Quod observavit Anatomicorum seculi hujus Princeps, * Scholæ Parisiensis decus, cui, si quid solidum aut verum de loricis scribimus hodie, debere memores nos fatemur. Quæ & quanta, ex illâ costarum incurvatione, malorum ilias oriatur, patebit abdomen apertum vel leviter inspicienti. Cuncta abdominis viscera repelluntur fursùm, coercetur atque impeditur Diaphragmatis motus, qui ægrè fit & reluctantè abdomine; tum laborabit pectus, minor erit Thoracis dilatatio, minorque Aëris quantitas inflabit pulmonum vesiculas; hinc respiratio difficilis & parva, mala hæmatosis, anhelatio, athsma. In arctius redacta abdominis viscera succo secernunt, elaborantque difficilius; eorum diametri minuentur, oblitterabuntur eorum colatoria; unde chlorosis, cardialgiæ, spontaneæ debilitates, obstructio, schirrus, malaque eorum pedissequa. Vas illud ingens, à quo, tanquam à fonte communi derivatur vita in partes inferiores, patitur compressionem multam; sanguis copiâ minori inferiorum vasa replebit, unde mensium suppressio, passio hysterica; dum inopiâ languent inferiores corporis partes, nimias opes non ferunt superiores; vasis inferioribus viam sanguini negantibus, vasa superiora, libe-

* M. Winslow, Mem. Acad. des Sc. année 1741.

riora urgentur pondere ; unde rixæ atque tumultus partium. Evenient Palpitationes, polypi, Phthises, Cephalalgia, anevrysmata, apoplexia, mortelque subitæ & immaturæ. Quæ demonstrant partium anatome, circulationisque leges, confirmat experientia rerum quotidiana, cum genus fœmineum circumdant morbi innumeri, quos ad vestimentorum suorum vincula diversa merito referas. Quæ formæ elegantiam brevem & fluxam pretio tanto mercantur ; ipsæ agræ, graciles, macilentæ, nulliûs vigoris, nulliûs corporis daturæ progeniem vitiosiorum.

V.

AT enim, spina debilis fulcro eget quo innitatur invalida. Quasi verò, qui os hominis & vultum ad cœlum erexit, possit abduci de viâ ; quasi tripudium & agitatio valeant minùs, quam carceres & lorica artubus confirmandis, aut suppetiis humanarum artium indigeat naturæ potentissimæ industria. Planta, tenui filo nitens, rectitudini suæ glebas officientes superat victrix. Animalia cætera in formam debitam exsurgunt, & imperfectus esset labor naturæ circa hominem solum, medioque in conatu deficeret ? Sed, quæ suademus, jam exsequuntur nonnullæ gentes mortaliûm : septentrionales populi, Americani, Africani, vinculis infantes nullis impediunt, & gibbosos, compernes, valgosque ignorant ; negotio minori parturiunt mulieres ; qualis fuit robore pater, talis est filius non degener.

(a) Regio est una sub Arcto posita, ubi cura multò etiam minor est infantium, libertas nutritionis : vix natos & rubentes adhuc deponit mater in loco communi ; hîc videres infantium cunabula strata junco palustri : circumstant vasa pleno lacte undantia, vel sero, adjacent propter unum quemque infantulum calami seu fistulæ, quibus possint ducere liquorem nutritivum ; adsunt quidem primis diebus mulieres quibus committitur provincia, ut aptent digitulis calamos leves, fugentibus labantes & invalidas sustineant manus : vix quartum diem adepti sunt, cùm, ministris inutilibus, sibi jam provident ; intra sextum mensem incedunt recti sanique ; cùm duodecimum obtinent, gestiunt paribus colludere, nulli infirmi, deformes nulli. Sed, dùm nullo fasciarum adminiculo sustinentur infantes, periculum est, ne à Gerulis duriùs attrectentur, spondyli vel repentino motu violentiùs diducantur, vel dùm parvuli crebriùs in unum latus procumbunt, enervatis in aliquâ parte, quibus continentur vinculis, disparili incremento augeantur : (b) propter summam enim, aient, omnium membrorum teneritudinem & ligamentorum quibus articuli comprehenduntur naturalem imbecillitatem, mollioremque ossium in appendicibus suis commissuram, facile distortionem, membrorumque deformitates fiunt, dum aliquâ, vel repentinâ, vel continuatâ corpusculi motione, ejusque sapiens in latus quoddam factâ inclinatione, ligamenta infirmantur, ossicula horumque appendices Cartilaginea pressa, vel paululum emota, inæqualiter crescent, & membra, ex alterâ parte depressa, ex alterâ exstantiora fiunt. Hæc præcavebuntur, si fuerit nutrix neque rudis, neque imperita, atque aptatæ fuerint infantibus vestes, quæ faveant attrectationi, motum vero necessarium, minimè coercant ; imò, è cunabulis ipsis, in quibus sit liberum ludere, tripudiare pro sui libito, pendeant infantes ab uberibus maternis ; ita rariùs attrectatis, minùs fiet ligamentorum relaxatio, alicujusque partis deformitas. Cuncta Fasciarum incommoda, oriuntur ex pravâ fasciandi methodo ; ritè colligentur ; doceantur nutrices, omne malum fugerit, excipienturque utilitates. Quoquo modo fiat Fasciatio, præmitur malis, ut pote naturæ instituto contraria, minoribus quidem, si

(a) Histoire
Naturelle du
Groëland.

(b) Platonius
in differat.
de Thoracibus.

rectè fiat; coëgeris autem priùs relabi Sequanam, quàm mutaveris mentes
feminarum istarum, quibus committuntur infantes; monitæ iterùm atque
iterùm, ad ingenium suum, ad consuetudinem usque recurrent.

Audiamus Loricarum defensores: Ergò decor omnis puellarum abit, qui
præcipuus ex statu & constantiâ corporis existit. Apage nugas; est verus de-
cor in naturâ, non in tormentis artis, fucove medicato pravæ consuetudinis:
feminas respice, quæ loriceis utuntur; has, ubi dimidiam decoris sui par-
tem posuerunt, venus fugit omnis, pendet caput, humeri fluunt, latera la-
bant, nihil virtutis superest, nihil gratiarum; dum rustica vel plebeia virgo;
quæ tali servitio non fracta est, it capite erecto, constanti, vim, robur,
sanitatem præferens. Neque credere est Loricarum usum esse semper neces-
sarium in dirigendis scapulis, quibus, si altera prominet, depressa sit alte-
ra, vis tunc infertur spinæ, cui non succurri potest, nisi scapularum situs
emendetur. Loriceis missis, fiet medicabile malum; scilicet flexu contra-
rio, quo, tandem eâ, quæ obliqua erant, corrigantur. Infantulos con-
trario brachio ferant gerulæ, mutantur illorum sedeculæ, Puellæ quæ se-
dent ad tendiculas, levâ manu acum trajiciant, &c. pueris injungantur eo-
rum vitiis accommodatæ exercitationes; v. g. ubi scapula depressior est, ma-
nu gerant bacillum paulo altiore, quo fulti procedant; alterâ, quâ illa emi-
net, pondus ferant; in his ne quid nimis, incidere in Scyllam, cupiens vi-
tare Charybdim (c). Consulatur Clariss. hujus Scholæ Doctoris liber, cujus
lectionem, non jucundam minùs, quàm utilem, omni familias matri suade-
mus. Mos Palæstræ elegantis à primis annis exerceat infantem, rudem in-
formet & perpoliat; sit Puella culta artibus decoris, elegantiarum Magistris
committatur ungue de tenero, non docenda ionicos motus, sed veneres
castas, situm atque habitum pudoris, quem virtus omni ætate sectata fuit.
Ergò exulent Loriceæ, valeant & Opifices talis tormenti. Ne properent adhuc
colligere sarcinas; sunt quas habet & diu habebit loricearum morbus, quas neque
ratio, neque fletus neque deformitates infantium, à præjudiciis dimoverint: quid
facias illis? jubeas miseras esse, libenter quatenùs id faciunt. Quin aliquan-
do, in pravâ partium conformatione, Loricarum usus suaderi potest; quod
Medicorum autem est, tractent Medici; Neque committatur cura hæc artis im-
peritis, qui Loriceis durioribus, imò ferreis imprudenter adhibitis, miseros
infantes excarnificant, sæpiùsque corporis deformitates augent, nedùm cor-
rigant. Si novissima verba loriceis dicantur, quot morbi, quot schirri, quot
cancri miseris pendent puellis, dum mammæ, non minùs ad ornamentum
luxûs, quàm ad prolis utilitatem sitæ, injuriis corporum externorum obnoxie
fuerint. Tantæ ne vos terreat malorum minæ; lorica levi, molli, tenuibus
& lentis Balneariis virgis constructâ servabitur pectus, & illa loriceæ species
non habeat ligulas solum in parte posticâ, sed etiam in lateralibus, quò Tho-
racis & Abdominis motibus, cedere facile queat; ita, non nihil providebitur
formæ & sine sanitatis detrimento.

Ergò nec Fasciæ infantibus, nec Loriceæ puellis,

Proponebat Parisiis HENRICUS-JACOBUS MACQUART, Remus,
Doctör medicus Remensis, necnon Saluberrimæ Facultatis Medicinæ Pari-
sensis Baccalaureus, Theseos Autor, A. R. S. H. 1753.

A SEXTA AD MERIDIEM.

Typis Viduæ QUILLAU, Universitatis & Facultatis Medicinæ Typographi, 1753.

(c) L'Ortho-
pédie, ou l'art
de corriger &
de prévenir les
difformités des
Enfans, par
M. Andry, 2
vol. in-12.